



**Grad Sarajevo**  
**City of Sarajevo**

Bosna i Hercegovina  
Federacija Bosne i Hercegovine  
Kanton Sarajevo  
Grad Sarajevo  
**GRADSKO VIJEĆE**

**ODLUKA**  
**O DAVANJU SAGLASNOSTI ZA OSNIVANJE REGIONALNE**  
**MREŽE PROJEKTNIH TIMOVA**  
**(Prijedlog)**

**Predlagač:** Gradonačelnica  
**Obrađivač:** Gradska služba za održivi razvoj

**Sarajevo, oktobar 2022. godine**

**Adresa:** Hamdije Kreševljakovića 3  
71000 Sarajevo, BiH  
**Tel:** +387 33 216 659  
**Fax:** +387 33 205 874  
**Email:** [gsgv@sarajevo.ba](mailto:gsgv@sarajevo.ba)  
**Web:** [gradskovijece.sarajevo.ba](http://gradskovijece.sarajevo.ba)



Na osnovu člana 26. stav 1. tačka 2. i člana 87. Statuta Grada Sarajeva („Službene novine Kantona Sarajevo“, broj 34/08 – prečišćeni tekst), a u vezi s članom 140. Poslovnika Gradskog vijeća Grada Sarajeva („Službene novine Kantona Sarajevo“, broj 28/09), Gradsko vijeće Grada Sarajeva, na \_\_. sjednici održanoj \_\_. \_\_. 2022. godine, donijelo je:

**(Prijedlog)**

**Odluku  
o davanju saglasnosti za osnivanje regionalne Mreže projektnih timova**

**Član 1.  
(Davanje saglasnosti)**

Ovom Odlukom daje se saglasnost za osnivanje regionalne Mreže projektnih timova.

**Član 2.  
(Davanje ovlaštenja)**

Gradonačelnica Grada Sarajeva ovlaštena je da u ime Grada Sarajeva potpiše sve akte koji će biti potrebni za osnivanje regionalne Mreže projektnih timova, kao i da bude koordinator Mreže.

**Član 3.  
(Stupanje na snagu)**

Ova Odluka stupa na snagu narednog dana od dana objavljivanja u „Službenim novinama Kantona Sarajevo“.

**PREDSJEDAVALAČI GRADSKOG VIJEĆA**

**Jasmin Ademović**

**Broj:  
Sarajevo,**

## OBRAZLOŽENJE

### PRAVNI OSNOV

Pravni osnov za donošenje Odluke sadržan je u članu 26. stav 1. tačka 2. i članu 87. Statuta Grada Sarajeva („Službene novine Kantona Sarajevo“, broj 34/08 – prečišćeni tekst) kojima je propisano da Gradsko vijeće donosi odluke, druge propise i opće akte i daje njihovo tumačenje, odnosno da Grad Sarajevo može pristupati međunarodnim udruženjima lokalnih zajednica i saradivati s odgovarajućim lokalnim jedinicama drugih država, u skladu sa zakonom, te da odluku o pristupanju udruženjima, odnosno ostvarivanju saradnje donosi Gradsko vijeće, kao i u članu 140. Poslovnika Gradskog vijeća Grada Sarajeva („Službene novine Kantona Sarajevo“, broj 28/09) kojim je propisano da gradonačelnica za ugovore iz oblasti međunarodne saradnje mora pribaviti saglasnost Gradskog vijeća, u skladu s Ustavom, zakonom i Statutom.

### RAZLOZI DONOŠENJA

Gradska služba za održivi razvoj koja se aktivno bavi apliciranjem na međunarodne fondove, uvidjela je potrebu za partnerstvom sa službama i projektnim timovima iz drugih gradova regiona s ciljem boljeg povlačenja sredstava iz međunarodnih fondova i obezbjeđivanja dodatnih resursa za kvalitetniji život u našim zajednicama. Ta potreba je u formi ideje za projekat predstavljena Vladi Njemačke posredstvom GIZ-a (Njemačke razvojne agencije) te je ista odobrena za finansiranje.

Odobreni projekat predviđa uspostavljanje i koordinaciju regionalne Mreže projektnih timova koja će za početak obuhvaćati 9 gradova s područja Zapadnog Balkana, sa tendencijom proširenja i na ostale gradove. Kroz različite aktivnosti, članovi Mreže bit će dodatno kapacitirani u svim fazama procesa upravljanja projektom, od provjere raspoloživosti sredstava, apliciranja za sredstva, implementacije i faze izvještavanja.

Grad Sarajevo, koji će biti koordinator regionalne Mreže projektnih timova, želi na ovaj način formalizovati saradnju između devet gradova u šest zemalja zapadnog Balkana, kao i definisati mehanizme saradnje, prijenosa znanja i proširenja Mreže. Mreža će se koristiti, ne samo za povećanje kapaciteta gradova za privlačenje sredstava i korištenje sredstava, umrežavanje i transfer znanja, već i za pripremu gradova za prijedloge projekata na osnovu potreba, onoga što treba riješiti i/ili rješavanje i pronalaženje rješenja za konkretne probleme.

Posebno je značajna činjenica da bi Grad Sarajevo po prvi put bio koordinator jedne ovakve Mreže, jer je do sada bio samo u ulozi člana različitih Mreža. Koordinacijom Mreže Grad Sarajevo ima priliku da se pozicionira kao lider u procesima privlačenja sredstava i implementacije kvalitetnih projekata u zajednici.

### SREDSTVA ZA PROVOĐENJE ODLUKE

Finansijska sredstva za provođenje ove odluke obezbijedena su od strane Vlade Njemačke posredstvom GIZ-a (Njemačka razvojna agencija) u iznosu od 300.000 EUR. Sredstva se realizuju putem GIZ-a, a namijenjena su za nabavku opreme za projektno timove (laptopi, kompjuteri, druga potrebna oprema za pisanje projekata i održavanje radionica) za održavanje edukacija za sve faze projektnog ciklusa (pisanje projekata, implementacija, izvještavanje), sastanke projektnih timova u svih 6 zemalja, izrada vodiča za gradove za apliciranje na projekte, komunikacijski kanali, proces zajedničkog apliciranja na projekte i druge aktivnosti predviđene projektom.